

गिरिजा

नय

(छन्द)

गिरिजाप्रसाद

रवि शाक्य, इखाछें, यल

हिइचापिं हिइमिइचापिं जिपिं
 नय्पित्यापिं म्वाय्पित्यापिं सिइपित्याःपिं जिपिं
 क्वँय् चुला नइपिं जिपिं ला मिया नइपिं जिपिं
 हिइचापिं हिइमिइचापिं जिपिं

नय्पित्याक नय्पित्याक बुँइ वनीपिं जिपिं
 नय्पित्याक नय्पित्याक गुँइ वनीपिं जिपिं
 नय्पित्याक नय्पित्याक स्कूल वनीपिं जिपिं
 नय्पित्याक नय्पित्याक अफिस वनीपिं जिपिं
 नय्पित्याक नय्पित्याक ज्यासलय् वनीपिं जिपिं
 दां मदय्क दां मदय्क पसलय् वनीपिं जिपिं
 नय्पित्याक नय्पित्याक छेँय् च्वनीपिं जिपिं
 ह्लिच्छि ह्लिच्छि चःति हाय्का लः त्वना च्वनीपिं जिपिं
 हिइचापिं हिइमिइचापिं जिपिं

नुगलय् घाः घाः जक हिइसे च्वंपिं जिपिं
 स्वः स्वः थाय्तक खिउँसे च्वंपिं जिपिं
 त्वाय्गु लँय् जक तुइसे च्वंपिं जिपिं
 धँय् लही मापिं जिपिं
 कुसि लही मापिं जिपिं
 पति लही मापिं जिपिं
 लखपति करोडपति धनपति जनपति लही मापिं जिपिं
 हिइचापिं हिइमिइचापिं जिपिं

हिइमिइ चाय्मते लागिलागि चाय्मते
 लने माः पिइ माः सिइकि नुगः
 ह्याउँगु सर्गतय् लहुइतिनि हुइतिनि
 हुइतिनि प्याखं ई व मुगः

छपलाः छपलाः यायां हे जक पर्वतया छ्यं न्हूगु खना
 बुलुहुं बुलुहुं चतंचा संकाः खुसिवाः नं जि छ्यूगु खना
 धिकिहिं धिकिहिं पर्वतया च्वं सूर्यःया जः लूगु खना
 छह्य छह्य यायां छह्य छह्य यायां दुश्मन फुकं फूगु खना
 धइव्यु नुगः जिगु छु जुल ननानं छु धाय्रमे छं जूगु खना
 बुलुहुं बुलुहुं कथंकथंछि
 हइ दय्का हइ न्हू देगः

याकनं च्वाच्चाकं छह्य च्वाकिं ह्सला प्वालपिलि वःगु खनी
 सिइकि वला खः संगु पताः थें ठक्कर अन गुलि नःगु दनि
 लनेमाः पिइमाः यःह्य व नं वइ हिमाल ह्सखना वःगु खनी
 खंकि थ्व बैय् हिं गन गन प्याःगु दु अन अन जःस्वां ह्सःगु खनि
 बुलुहुं आकसय् नगु थें इलिइलि
 जःया स्वां ह्सइ इगः मिगः

खिउँ सुपांय् तर खितिक जुइवं
 हसला गथे लुइ सिइकि छं
 खिउँ नुगः तर चिरिक गुइवं
 मिजला गथे लुइ सिइकि छं

मितिकि फुतिफाति मुना मच्चंगु चीज धरतिइ छं महुं
 सूर्य छह्य छह्य सुला मच्चंगु बीज धरतिइ छं महुं
 त्याफिल्वहँ तर तिरिक न्याय्वं
 मिपुसा गथे लुइ सिइकि छं —

कीगु धरतिइ च्वंगु ध्रुव नगु फू याना स्याय् फइ सुनां
 मू हिया मू जः अमरगु फू याना स्याय् फइ सुनां
 गुलि इताः दनि थि जक थिइवं
 गथे व मत जुइ सिइकि छं —

थःगु नुगः दुने राम मखंसा
 राम ल्वहँया खनां छु याय्
 मनूया वाखं कनां मथूसा
 द्यःया वाखं कनां छु याय्

गरीवया बल्चाय् जन्म जुया थौं राम सिनाच्चन नय् मखना
 देगःया पिने जः खः लँ सिथय् राम फवनाच्चन नय् मखना
 देगःया दुने कः कः धाः थाय्
 दक्षिणाय् दक्षिणा तनां छु याय्

नितका दामं सीता हरण जुल रामं जा छपे नके मफया
 नितका दामं चीर हरण जुल रामं पर्सि बिइ मफया
 रामया दुःखय् ख्वबि मवःसा
 रामया वाखं न्यनां छु याय्

जय जय साहिँली रेशम वेकारे धाल जि
थौतिनि हि त्वंगु चाल जि -

उखनु बहनी वा वः बले शहीद गेट्य् द्यना
निभाः लुइव द्वक ज्वना अप्पा ल्हेत दना
स्वइगु लागि साहिँली रेशम छेँ दय्के माल जि -

कमीज गुत प्याँहाँ वयां दंदि ध्वाकाय् क्यना
थस्वयां जि घरेलुया साइनबोर्ड खना
दंदि च्वका साहिँली रेशम दंत थें ताल जि -

वीर अस्ताल न्ह्यःने थुथुर खाक द्यना च्वना
जँ हे त्वधुक पुलिसं दाल कथि ल्ह्वना
धुसि लुया साहिँली रेशम फवना नय्माल जि -

सोल्टि होटलया लँ सिथे जाथुया गोल्टिने
खिचा छह्वा वयाच्चन वैत निगः इने
स्वैके पल्सा साहिँली रेशम काय्माःगु सिल जि -

हो लागे शिर्षक शिर्षक निवेदित एक एक
— हो लागे ६ पुस्तक हो नीतीति

साहुते पॅलिना गरीव ख्याना

फुई याइहा बलवान छ

साहुतेसं जक दम बिल धाय्वं

तिन्हुइहा पलमान छ

मनूया जीवन पशु जुया जक फूसां चिउताः छंत मरु

अय्लाः छखला त्वने दत धाय्वं छुं हे धंदा छंत मरु

व सँय्खिचां थें व वँय्खिचां थें

न्याः वइहा वेमान छ

तःमिते तुति उसिउसि याना चोमित प्यंका च्वंहा छ

तःमित न्हीका चोमित खेका देश स्यंका च्वंहा छ

छिमि मां गय् च्वं छिमि वौ गय् च्वं

धैव्यु सुया संतान छ

खुसि जि क्वे क्वे गंगु खना

च्वे च्वे बुइँ लः यंगु खना

अथे हे थःथाय् बुइँ बुइँ यनेत

जनता नं जि पंगु खना—

जनता नं थन लः बाः थें खः सुनां पनाः छखे छ्वय्फु खनी

थः मामाथाय् जनता यंका ध्यवा नं सय्का नय्फु खनी

जनतां अज नं होश मयासा

गालय् दुने जि त्यंगु खना—

चोपो मदुगु व न्हू न्हू नारां मनूत हेका यनेफु खनी

मनू मिया नय् पल्केथूपि मछाः मजूसें दनेफु खनी

तर जनता छन्हु किसिद्वंब्बः जुइ

इतिहासं जि कयंगु खना—

मां नं बिइमानि च्यः नं च्वनेमानि धैगु पुलांगु खँ

तर थौं तक नं न्हूगु तिनि

मखु वाखं नं मखु थ्व ख्याःखं नं

ह्मिगः ह्मिगः हे जूगु तिनि

मांया ला चिचि त्याइह्य गिद्धया

खा गथे स्वत जुइ धाय्मफु जि

कीगु मिखाला केवल मांया

दर्शन यायेत ब्यूगु तिनि

अय् मां, थुलितक नामर्दह्य काय्

जन्म बिया छाय् तयागु छं

विद्रो' याना प्यां' वय्फुह्यसा

वीर धका धाय् ज्यूगु तिनि

७ सालया ध्वँ प्याँ' वैच्वन

अहो ! चिहानं छयँ प्याँ' वैच्वन

तर आः ध्वँ लाय् फइमखुत

आः कंगः लाय् फइमखुत

किसान मजदूर विद्यार्थिते हिं थनया फय् नस्वाःगु खना
बैय् वाःगु हिहे फय्यत् चिहानं थाँथाँ वैच्वन व छयँ ल्हना

तर आः ध्वँ लाय् फइमखुत

जनतां किसिद्वँब्वः कागु खना महलत थर थर खाना
वाँध ध्यवाया दय्कः वइच्वन मनूत छह्य निह्य न्याना

तर आः ध्वँ लाय् फइमखुत

अय् जनता किसिद्वँब्वः कै हुँ थःगु सफलता जः खः स्वै हुँ
थःगु सर्गते थःगु पर्वते थःगु ह्यगसया तसविर च्वै हुँ

आ कंगः लाय् फइमखुत

-खिउँगु थ्व चाह्लय् थ्व छु सः वःगु ?

-मस्तेगु पलाः न्ह्याःगु थ्व खः

-खिउँगु थ्व चाह्लय् थ्व छु जः वःगु ?

-मस्ते मिखा प्वाः चाःगु थ्व खः

-कालाकुलु हापिं मस्तेगु सलय् सुथया हे सः वः थें च्वं

-खिउँसां पचिपपि याना जूथाय् सुथया हे जः वः थें च्वं

-खिउँगु थ्व चाह्लय् वास छु वःगु ?

-ह्याउँ निभाः नस्वाःगु थ्व खः

-जः प्याःचागु थ्व देश लुमंका सुथला उई हे जू थें च्वं

-वाह्लाः तः थें घंगला न्याय्का उई थें प्याखं हू थें च्वं

-चान्हे नं गथे घंगला न्याःगु ?

-ह्मगसय् प्याखं हूगु व खः

-हिइमिइ चाःपिं मस्ते नुगलय् ह्याउँक खनेदुगु रंग छु खः ?

-अमिगु नुगः दुने सुथ जुल आहा ! सुथया ह्याउँगु रंग व खः

-चाह्लय् नं गथे रंग पिचाःगु ?

-चा भति भति भूवाःगु थ्व खः

थुइक्क थुकलं विइतिनि छंत
 छंगु बाखं सिलकि थ्व समाजं
 नागं लिउ थें लिइतिनि छंत
 छंगु बाखं सिलकि थ्व समाजं

पर्वतया च्वकाय् सुंक च्वनानं पर्वत व्वविया धाइह्य छ खः
 थः जक मोजं च्वने दत धाःसा देशहे नांगा याइह्य छ खः
 मोज वय्क थ्वाइतिनि छंत
 छंगु बाखं सिलकि थ्व समाजं

छु मसिउपि वफरा वइच्चन छंथाय् आशया कोलि ज्वना
 छंगु बाखं सिलकि वइतिनि छंथाय् नाशया गोलि ज्वना
 धैंग मुइका हइतिनि छंत
 छंगु बाखं सिलकि थ्व समाजं

वाखनय् थें हे थौंया कन्हे हे
 सिमा छमा जि बूगु खना
 खः व ध्यबा जक सइगु सिमा
 कथिं दाया हाय्कूगु खना—

किसान मजदुर विद्यार्थीति हिं फू चाःगु थ्व वँय् बूगु सिमा
 खःगु थःगु लँय् न्ह्या न्ह्या वं वं जनताया लँय् बूगु सिमा
 जनता इतिमिति कंकेत चतकें चतक याना बुइकूगु सिमा
 ७ सालया क्कंगः हांः वल व सिमाय् पंचम सोरं
 क्कंगः ओहो क्कंगः लाःवल व सिमाय् पंचम सोरं
 कीगु मिखाय् थौं धू हाः याःवल व सिमाय् पंचम सोरं
 वा थ्व सिमा क्वःथले वा कीसं, मनू नैगु मा माःगु मरु
 थ्व सिमाय् च्वंपि क्कंगः छह्य हे जनताया थः लाःगु मरु
 कीत सिमा माः मानवताया सुतां थ्व मा माः धागु मरु

तपाः खाःपाः खनेवं ग्याइला थौया ल्याय्हा जिपि
लू निभाःया जः जिपि न्ह्याव्लें त्वइच्चनिपि

थःगु हिचःति जीवन हनिपि

छाय् ग्याय्माःगु जिपि

छिमि थें स्वैतं ख्यानाः नय्मागु मदु जिमिला

छुं मसिउपि स्यानाः जीवन हनेमाः छिमिला

छिमिला खिमिला जिमिला तिमिला

छाय् ग्याय्माःगु जिपि

छिमिसं केल्लाः याना घाः जूगु दनि नुगलय्

केल्लाः बल्लाः याना घाः जूगु दनि नुगलय्

कलमं मलनाः मलमं मलनाः

खः ल्वाय्माःगु जिपि

जनता खुसिवाः न्ह्याः थें न्ह्याय्ब्यु

वा-फय् वः थें जनता वय्ब्यु

वा-फय् वय्बं सिमा क्वःदली तर सितुघाँय् ग्याय्मागु मरु

कंगः लाइपिं कंगः च्वनिगु थ्व सिमा याकनं क्वःदले ब्यु

वा-फय् वः थें जनता वय्ब्यु

जनता खुसिवा न्ह्याः थें न्ह्याय्ब्यु

खुसिवाः वय्बं चा-ल्वहँ चुइकै किनार छुं ग्याय्मागु मरु

मनूत नइपिं लाखे थज्याःपिं ल्वहँ फुक चुइका यनेब्यु

जनता खुसिवाः न्ह्याः थें न्ह्याय्ब्यु

वा-फय् वः थें जनता वय्ब्यु

चिरंजीवि वावु राजा चिथि छंगु थ्यन वावु
 जुल धयाहल हवल्दार
 तःमित पाखे लिना चीमितेत कसा याःसा
 सह याय् मखु जि खवरदार -

विद्यार्थीत हाः वल हँ, मस्यू छु छु धाः वल हँ,
 दुखी गरीवतेगु निंति ज्यान प्राण पाः वल हँ
 अमित गोर्लि केकूसा छं जिगु छातिइ लाइ वावु
 मां बौया खः अपि आधार -

दुःखया थ्व गां त्वःता, सुखया शहरय् वना,
 स्वैत ख्याना तुप ज्वना, लहरी मोटरे च्वना ?

तःमितेत रक्षा याय्त तुपः ज्वने गात वावु
 गरीवयात ब्यु अधिकार -

ह्लिच्छि ह्लिच्छि ज्या सनानं छिमि मांया प्वाः मजानि
ह्लिच्छि ह्लिच्छि ज्या वनानं छिमि वौया नय् मखंनि
स्वैगु लाणि ल्वाना वावु, स्वैगु लाणि सिना पुता
याना व्यु मां वौया उपकार -

जिगु चःतिया सवाः वै, सासाःगु नैवले छं
जिगु ख्वविया सवाः वै, ह्लिला ह्लिला स्वैवले छं
गरीवया हिचःति हे हिराम्वति जुइगु वावु
गनं जाल धा व भण्डार -

विद्यार्थी मचात ज्वना कसा यात धागु न्यना
मिखां ख्ववि वल वावु नुगः जिगु हिसे च्वन
मां जितः धाय् मानिसा मिखा कना खंकि वावु
जुयाच्चंगु अन्या अत्याचार -

तदँ न्ह्यः जनताया निति च्वयातःगु कविता सकू 'आग'
या कवि गिरिजाप्रसाद आः तं जिमिसं जनताया पुचलय् खना ।
वहे पुचलय् च्वनाः 'जनताया म्ये' हालाच्च्वंगु न्यना । थ्वहे
म्येया सलं खुदँ न्ह्यः निसं द्यनाच्च्वंम्ह मिठ्वाला प्रकाशन-
यात हाकनं छकः न्ह्यलं थनाविल । थुकिया हे लिच्चः कथं
थ्व 'जनताया म्ये, छव्व' म्ये सकू पिथनाच्च्वना ।

नयेमखं, त्वनेमखं, पुनेमखंया समस्या, हालेमज्यू, सनेमज्यू-
या वन्वनया विरुद्धय् जनतां न्ह्याकाच्च्वंगु पलाखय् पःखाः
दनाः पं वयाच्च्वंपि अधिनायकवादी, प्रतिक्रियावादी व थुमि
दलालतय्गु कुकृत्यया भण्डाफोर यायेगु ज्या थ्व म्ये याना-
च्च्वंगु दु । थौं जनता गुगु लँपु न्ह्यायेमाःगु दु, पंगः गुकथं
चीकेमाःगु दु धैगु स्पष्ट व्याख्या यानाः थौं झीसं ज्वने माःगु
धात्थेगु लँपु क्यनेगु ज्या जूगु दु । अले थज्याःगु ज्याया निति
प्रकाशनया अभिभारा कविव्याः छुं तिवः वी दुगुलि मिठ्वाला
प्रकाशनं थःगु गौरव तायेकाच्च्वंगु दु ।

—मिठ्वाला प्रकाशन, येँ

ने. सं. १९०० पाहाँचःहे

थाकथिः— आर्ट प्रिन्टिङ्ग प्रेस, ज्याःवाहा, येँ मू-११-